

zcum Schessouchin; Jacob Rabe hat eyne hufe holczis zcum Schessouchin vnd eyne hufe ackirs zcum Horste; Ditterich Claws hat eynen garten zcum Schessouchin, do von her zcinset drye groschen uf sente Michils tag, ouch hat derselbe eyne halbe hufe holczis do selbins; Heynich Wenczener hat eyne hufe ackirs vnd eyne hufe holczis zcum Schessouchin; Heynczil Reynecz hat eyne hufe ackirs vnd eyne hufe holczis zcum Schessouchin; Petir Vögeler hat eyne hufe ackirs vnd eyne hufe holczis zcum Schessouchin; Mertin Kluge hat eyne wiße zcum Schessouchin, do von her zcinset sechs groschen uf sente Michils tag. Disen vorgnanten kouf vnd alle stucke vnd artikil haben wir egnanten Hans von Milin vnd Heynrich Crymmen globit vor vns vnd alle vnser erben vnd globen in guten truwen ane allirleye argelist vnde ane allis geuerde den egnanten herren . . dem tumprobiste, dem . . techande vnd dem capitil gemeyne zcu Misne stete gancz vnd vnuorbrochenlichen zcu halden, vnd dawidir nummer zcu tuhende, vnd haben des zcu warem geczugnisse vnd merer sichirheit vnser insigele an disen brif gehangen, der gegeben ist noch Cristi geburte dryczenhundert iar in dem achtzigistem iare an allir heiligen tage. Disen kouf haben geteidingt di erbern manne her Heynrich von Tubinheim pharrer zcu Schilow, Wygand von Tubinheim gesessin zcu Lympach, Hans Eckilman vnd Petz Schroter burgere zcu Misne, vnd sin ouch do by gewest Hans von Tubinheim gesessin zcu Praszewicz, Nickil von Tubinheim gesessin zcu Mokrus, Henzil von Kouffungen, her Pauwil von Friberg vnd her Jacob von Somerfeld, vicarien zcu Misne vnd andir gutir lute gnuk, phaffen vnd leyn, den wol ist zcu glouben.

Nach dem Orig. im Stiftsarchiv zu Meissen mit den Siegeln der Aussteller an Pergamentstreifen.

No. 665. 1380. 7. Nov.

*Dieselben bestellen wegen vorstehend genannten Verkaufs und hiernach geleisteten Verzichts drei Bürgen.*

Wir Hans von Melin vnd Heynrich von Crymmen sin ôheme vnd vorsteher gesessin zcu Nuenwalde, bekennen offnlich vor vns, alle vnser erben vnd erbnemen vnd tuhen kunt allen di disen brif sehen adir horen lesin, daz wir mit gutem vorrate vnser fründe vnde wolbedochtem mute rechtlich vnd redelich vorkouft haben vnsir gütir zcum Schessowchin vnd zcum Horste, in dorfen vnd in velden, mit allen rechten vnd zeugehorungen nichtis usgenomen adir vns keynerley zcu behalden, noch lute andir vnsir brife, di wir ubir den kouf gegeben haben den erbern herren . . deme tumprobiste, . . dem techande vnde deme capitil gemeynlich zcu Misne vnd haben denselben herren globt in guten truwen ane argelist vor eyne gute vnde rechte gewehere vnd vor allirleye ansproche, di wir entwerren wollen vnd sullen, als gewonheit ist in deme lande, vnd globen en daz ouch sichirlich mit orkunde dises brifes, dor an wir vnser insigele gehangen haben. Vnde haben den egnanten herren dovor zcu burgen gesaczt di gestrengen Wygande von Tubinheim zcu Lympach, Nickil von Tubinheim zcu Mokrus, vnd Hanse von Tubinheim zcu Proschwicz gesessin, di mit vns vnde vor vns alle di obingeschriben rede vnde glubde mit